

671.1267
078
17

大城縣志

卷之九

人物志

列女

武寧縣志

FDG

大城縣志卷之九下

終

烈女烈婦傳

明

馬氏女名四德馬英女年十七未字正德四年劉寇劫掠女匿後園中被賊搜獲欲犯之女大罵不屈賊怒殺之有司以聞建坊旌表

牛氏女名狄英年十六歲未聘正德六年爲劉寇所執欲汚之以計脫投井死後人名其井曰清風井

國朝

張某女煥姐挑菜遇狂夫牽其腕欲汚之大罵不從歸

家自縊死

明

烈婦傳

劉氏生員王章吉妻遇變不辱罵賊被殺

杜氏章吉僕李桂妻同時不受辱死

高氏文安人知縣高哲妹生員竇宗儼妻遭變不辱罵

賊被殺

張氏王良眉妻隨夫居京師劉寇之亂自縊死

馬氏舉人劉汝爲妻夫病危卽許以身殉夫歿漿水不
入口幼女哭號弗恤也旬餘卒於夫柩之側

于氏張大經妻夫亡氏甫十九歲誓以身殉水漿不入
口者六日家人慰解之佯許以不死後乘隙自縊桑
林志亦烈哉

張氏祝綸妻綸代父死罪繫獄時尙未歸綸卽躬訴願
代夫死當事義之

國朝

齊氏梁玉珍妻夫亡將以身殉姑慰止之養姑畢自縊
死有傳

邢氏李連科妻夫亡自縊死陳村有碑

賈氏韓遇雲妻咸豐四年粵匪過境罵賊死有傳

駱氏馬廷梅妻拒姦不從被殺有傳

張氏崔玉堂妻夫亡守節十餘年同治年其子追賊被害氏至賊前冒賊刺殺之有傳

馬氏蕭林妻夫亡父受豪右之聘不從自縊死有傳

貞女傳

任氏女貢生任聯第女字青邑劉氏子劉卒女絕粒死有傳

高某女穩姐幼字馬松年童養於馬未婚而馬卒女矢

志守貞孝事孀姑以女紅奉甘旨母族私賣之黑夜將奪其志親鄰救護女亦執兵自衛未遭強暴乘間

鳴官官捐廉贍之

劉氏女邑東關人字郝莊馬其注有傳

駱烈婦傳

邑人 薛步瀛 雲洲

烈婦駱氏大城縣南賈村民家女五台馬廷梅妻也和
平貞靜婦道甚修翁姑族黨咸稱之同治甲戌歲馬欲
僱一傭其族弟某倩人先容烈婦聞之語夫曰翁不幸
已歿姑老且病治家事者惟夫與妾耳傭工宜得一篤
厚者爲善若人素無行盍卻之其夫曰彼矮且疲何能
爲況人棄之而我用之彼雖無良獨不念吾體恤情乎
曷慮焉烈婦知婦道以順爲正遂聽之某至廷梅家烈

婦以禮相示某以叔嫂之間時有戲言烈婦每厲辭正色以挫抑之因謂其夫曰彼自入門以來舉之不端賴吾防閑有法其禽獸之心始無以肆然日久恐有他變也曷絕之乎夫曰是宜委婉以卻之勿驟也及中秋後因以年歲饑饉需人無資爲辭某不肯去一日馬在田中守禾稼某自歸見烈婦獨在室將行無禮烈婦不從某以刀相逼烈婦大罵不少屈某暴怒遂刃之嗟乎烈婦之命慘矣烈婦之節全矣氏死時年始二十餘二子皆幼穉姑自外至見之驚絕急呼鄰人至圍之某不能脫乃以刀自刺死馬自田間歸見某已自戕乃隱忍其

事未訴於官嗚呼強暴雖死而烈婦有知能無抱餘痛於地下乎

論曰人生所最愛者軀命婦人所首重者名節駱氏之遇害也其夫之從弟地山持一紙來示予且囑予爲傳以表揚之予不覺慨然曰嗟乎人當軀命所關雖詩書者流且多偷生苟免者況婦人女子能必其不爲所奪乎當強暴見逼之際使剛腸稍屈吞氣忍辱豈不可以免死乃憤不顧身甘蹈白刃而節賴以全亦可謂一死重於泰山矣卒使凶暴之徒立地就戮雖倖逃法網安知非烈婦之靈褫其魄於冥冥之中不使之少延其生

方城縣志 卷九 列女
哉用是大書之以爲節烈者風

蕭烈婦傳

邑人 貢生 任聯第 杏田

烈婦姓馬氏縣南大木橋民女也于歸五台蕭氏子容止端莊性情和靜不數年夫死無子有孀姑遂矢志養姑不他適姑稱其孝戚黨無閒言邵村李某者聞婦賢欲爲子聘之然恐其不從也託媒以金帛啗其父其父給女歸婚有期矣烈婦始知之因託以歸祭故夫旣抵家遂以死自矢李某聞之怒必欲得婦因單辭誣控烈婦知事難中止謂姑曰初心所矢者本欲姑存則婦存姑亡則婦亡今再緩須臾身敗名裂矣遂投繯嗚呼烈

哉方烈婦之死也議者謂其不死於未控之先而死於
既控之後其初似亦願嫁者嗚呼世豈有願嫁之婦不
能忍辱偷生而甘心就死者耶宋李若水有誤君之罪
及罵賊而死綱目大書曰金劫上皇及妃后太子宗戚
至其軍吏部侍郎李若水死之並不咎其既往况烈婦
一農家女而至性過人事可已則養姑以生不可已則
殉夫而死其成仁取義抑何其從容不迫哉

論曰死生亦大矣平生談忠孝說節義指天誓日如不
欲生及大節當前輒復隱忍苟活雖丈夫猶然何況女
子今有一矢死靡他者其剛正之氣足以奠坤維則雖

死猶不死矣又何事多求詩曰誰謂汝無家何以速我
訟雖速我訟亦不汝從烈婦有焉

韓烈婦傳

鄧毓怡 邑人

韓烈婦賈氏河間人少貞慧嫻文訓有談古今節烈事
者聽之不倦十八歲歸大城韓遇雲幽閒貞靜克盡婦
道咸豐四年粵匪過境獲賈欲犯之脅以刃不屈復甘
言勸之氏怒叱曰若輩賊子曾不狗彘若我恨非男子
不能取若頭豈以清白軀從汝乎速殺我勿多言賊怒
遂兵之至死猶罵不絕口嗚呼烈哉贊曰

白刃逼於前甘言誘於後丈夫且將易其守況婦人乎

烈婦被獲時豈不知屈身可免而義之所在不以生死奪勇何如哉經曰殺身成仁烈婦有焉

謝烈婦傳

鄧毓怡

邑人

烈婦魏氏大城安慶屯人也十九歲歸同邑謝濬源嫻婉幽靜克盡婦道是年冬大疫僵仆相望翁姑相繼逝濬源亦以哀毀致疾魏侍之一如侍翁姑時親奉湯藥不脫衣鬻簪珥禮斗禱佛冀少濟知不治欲以身殉轉思夫未死而已先死是促之死也況先死誰安翁姑窀穸者因飲泣而止濬源將死呼魏曰汝年甫二十旣無翁姑又無子女宜自爲計我不忍誤子終身也氏泣曰

嗚呼是何言歟脫有不諱從君地下耳濬源死氏慟絕
復蘇呼籲戚黨安葬三喪乃伏墓大哭嘔血數升死人
言其不食已十日矣嗚呼烈哉時同治二年三月八日
也贊曰

無親無子身無所依志少不堅難言守節乃義不獨生
相從地下志已烈矣然必安葬翁姑俾無暴露之患則
烈婦又孝婦也

葉烈婦傳

鄧毓怡

邑人

烈婦邢氏大城邢家莊人安慶屯葉宜春妻也宜春故
有疾十八歲而娶未愈也邢于歸後日夜侍藥餌目不

交睫奉事翁姑皆一身任之家人翕然稱其賢年餘宜
春歿邢慟不欲生恐傷翁姑心始強食息誓事翁

他適先是宜春歿時富家某素聞婦賢欲得之使鄰媼
說婦曰子無子煢煢何所依以子之年安往不得富且
貴者而乃日食糠覈爲何自苦也婦曰吾有翁姑在何
云靡依卽無依亦不易志貧富非所知媼知不可奪遂
止富家聞而益賢之復憇惠其父母父母許諾婦不知
也將至期始以告烈婦知不獲已乃絕粒旬日泣拜翁
姑曰兒前不殉夫者以有翁姑在今如此命也兒不孝
不能事親矣願翁姑好自愛勿以兒爲念言已遂絕年

十九歲贊曰

貧賤不移富貴無奪在修士猶難之烈婦明於此義視死如歸一何烈歟况始終以孝親爲心臨絕數語哀感三靈嗚呼可以立人紀矣

崔烈婦傳

鄧毓怡

邑人

崔烈婦張氏大城崔玉堂妻也玉堂歿遺孤歲餘張年二十二或勸之嫁氏曰上無翁與姑夫死吾何必生所以不死者爲撫孤延嗣耳吾若嫁呱呱者將焉託乃紡績撫子十餘年足不出外戶子稍長教之讀日訓以忠孝節義事於是鄉里皆稱之同治六年馬賊犯境氏子

與梁大起等同時戰歿氏聞之大哭曰吾不以死殉夫者爲撫孤可以承宗派今若此吾焉用生爲遂造賊前大罵曰若輩獨非父母生奈何自視若禽獸皇恩國法置不顧慘殺生靈曾不少有人者心吾生不能殲爾類死當化爲厲鬼啖爾肉賊大怒遂刃之噫烈矣哉贊曰昔張巡以罵賊死爲國難也今烈婦亦以罵賊死爲孤亡也所殉雖不同其視死如歸則一也浩然正氣無愧睢陽洵女中丈夫哉

沈烈婦傳

馮履中

邑人

沈烈婦張氏大城朱家村沈廣維之妻也十七歲于歸

翁已故孀姑在堂居室七日廣維謂之曰如此奇窮難以株守吾欲外出謀生還無定日堂上老母奉養無人吾去後汝能養之乎婦應曰諾夫去婦采薪紡績操作忘勞以婦道代子職者十餘年姑憐之曰吾兒死生未卜汝可他適勿以吾故而受此苦也婦泣曰婦去姑將誰依兒願強力支持以養老母卽餓死亦分也兒豈以生死易心者於是姑稱其孝人無閒言其父亦以其壻久而不歸也將再醮之婦拒之曰夫去時囑兒供養老母兒已許之矣若改嫁是舍親背夫也舍親不孝背夫不義不孝不義何以生爲父母懼不敢強婦從此與母